

王臨川全集

~ 16  
891  
4





16  
891  
4



王臨川全集卷九

古詩

孔子

聖人道大能亦博學者所得皆秋毫雖傳古未有孔子蠖  
蠖何足知天高桓魋武叔不量力欲撓一草搖蟠桃顏回  
已自不可測至死鑽仰忘身勞

楊雄二首

子雲游天祿華藻銳初學覃思晚有得晦顯無適莫寥寥  
鄒魯後於此歸先覺豈嘗知符命何苦自投閣長安諸愚  
儒操行自爲薄謗嘲出異已傳載因疏略孟軻勸伐燕伊  
尹干說亳叩馬獨兵鋒食牛要祿爵少知羞不爲況彼皆



卓犖史官蔽多聞自古喜穿鑿

一

子雲平生人莫知知者乃獨稱其辭今尊子雲者皆是得子雲心亦無幾聖賢樹立自有師人知不知無以為俗人賤今常貴古子雲今存誰女數

漢文帝

輕刑死人眾喪短生者倫仁孝自此薄哀哉不能謀露臺惜百金灞陵無高丘淺恩施一時長患被九州

秦始皇

天方獵中原狐兔在所憎傷哉六虜王當此驚鳥鷹博取已掃地翰飛尚憑凌遊將跨蓬萊以海為上陵勒石頌功

德羣臣助驕矜舉世不讀易但以刑名稱蚩蚩彼少子何用辯堅冰

韓信

韓信寄食常歉然邂逅漂母能哀憐當時噲等何由伍但有淮陰惡少年誰道蕭曹刀筆吏從容一語知人意壇上平明大將旗舉軍盡驚王不疑抹兵半楚灘半一作搏沙兵擊楚從初龍且聞信怯鴻溝天下已橫分談笑重來卷楚氛但以怯名終得羽誰為孔費兩將軍

叔孫通

先生秦博士秦禮頗能熟量主欲有為兩生皆不欲草具一王儀羣豪果知肅黃金既徧賜短衣亦已續儒術自此



凋何爲反初服

東方朔

平原狂先生隱翳世上塵材多不可數射覆亦絕倫談辭最諛怪發口如有神以此得親幸賜予頗不貧金玉本光瑩泥沙豈能堙時時一悟主驚動漢庭臣不肯下兒童敢言平津何知夷與惠空復忤時人

楊劉

人各有是非犯時爲患害唯詩以譎諫言者得無悔汾王昔監謗變雅今尚載未俗忌諱繁此理寧復在南山詠種豆議法過四罪元都戲桃花母子受顛沛疑似已如此況欲諄諄誨事變故不同楊劉可爲戒

臧倉

位在萬乘師孟軻猶不遇豈云貧與賤世道非所趣意行天下福事忤由然去命也固有在臧倉汝何與

田單

潛王萬乘齊走死區區燕田單一卽墨掃敵如風旋舞鳥怪不測騰牛怒無前飄颻樂毅去磊砢功名傳掘葬與劇降論乃愧儒先深誠可奮士王蠋豈非賢

戴不勝

昔在宋王所皆非薛居州區區一不勝辛苦亦何求懷祿詎有恥知命乃無憂此士自可憐能復識此不

陸忠州



虞人以士招御者與射比當時尚羞爲況乃天下士英英  
陸忠州學問輔明智低徊得坎坷勳業終不遂

開元行

君不聞開元盛天子糾合儔傑披姦猖幾年辛苦補四海  
始得完好無疽瘡一朝寄託誰家子威福顛倒那復理那  
知赤子徧愁毒祇見狂胡倉卒起茫茫孤行西萬里偪仄  
歸來竟憂死子孫險不失故物社稷陵夷從此始由來犬  
羊著冠坐廟堂安得四鄙無豺狼

和送行效張籍

一車南一車北身世忽忽俱有役憶昔論心兩綢繆那知  
相送不得畱但聞馬嘶覺已遠欲望應須上前坂秋風忽

起吹泥塵雙目空回不見人

陰漫漫行

愁雲怒風相追逐青山滅沒滄江覆少畱燈火就空牀更  
聽波濤圍野屋憶昨踏雪度長安夜宿木痛還苦寒誰云  
當春便妍暖十日九日陰漫漫

一日歸行

賤貧奔走食與衣百日奔走一日歸平生歡意苦不盡正  
欲老大相因依空房蕭瑟施繡帷青燈半夜哭聲稀音容  
想像今何處地下相逢果是非

沐水

沐水無情日夜流不肯爲我少淹畱相逢故人昨夜去不



王臨川全集卷九  
知今日到何州州州人物不相似處處蟬鳴令客愁可憐  
南北意不就二十起家今白頭

陰山畫虎圖

陰山健兒鞭鞞急走勢能追北風及逶迤一虎出馬前白  
羽橫穿更人立回旗倒戟四邊動抽矢當前放蹄入爪牙  
蹭蹬不得施積上流丹看來濕胡天朔漠殺氣高煙雲萬  
里埋中刀窮廬無工可貌此漢使自解丹青包堂上絹素  
開欲裂一見猶能動毛髮低徊使我思古人此地搏兵走  
戎羯禽逃獸遁亦蕭然豈若封疆今晏眠契丹弋獵漢耕  
作飛將自老南山邊還能射虎隨少年

杜甫畫像

吾觀少陵詩爲與元氣侔力能排天幹九地壯顏毅色不  
可求浩蕩八極中生物豈不稠醜妍巨細千萬殊竟莫見  
以何雕鏤惜哉命之窮顛倒不見收青衫老更斥餓走半  
九州瘦妻僵前子仆後攘攘盜賊森戈矛吟哦當此時不  
廢朝廷憂常願天子聖大臣各伊周寧令吾廬獨破受凍  
死不忍四海寒颼颼傷屯悼屈止一身嗟時之人死所羞  
所以見公畫再拜涕泗流惟公之心古亦少願起公死從  
之游

吳長文新得顏公壞碑

魯公之書旣絕倫歲久更爲時所珍荒壇壞冢朽崖屋剝  
落風雨埋煨塵斷碑數尺誰所得點畫入紙完如新延陵



公子好事者拓取持寄情相親六書篆籀數變改訓詁後  
世多失真誰初妄鑿妍與醜坐使學士勞骸筋堂堂魯公  
勇且仁出遇世難親經綸揮毫卓犖又驚俗豈亦以此誇  
常民但疑技巧有天得不必勉強方通神詩歌甘棠美召  
伯愛惜蔽芾由思人時危忠誼常恨少寶此勿復令埋堙  
荅揚州劉原甫因君古人風  
更欲投吾簪

寄岳州張使君

昔人寧飲建業水共道不食武昌魚公來建業每自如亦

復不厭武昌居武昌山川今可想綠水逶迤煙莽蒼白鷗  
晴飛隨雨漿岫薺茸茸喚魚網投老畱連陌上塵思公一  
語何由往

送元厚之待制知福州

海隅山谷間人物最多處平旦息相吹連城默如霧閩王  
舊宮室丹漆美無度今爲大帥府千里來赴愬元侯文章  
翁更以吏能著峩峩中天閣鳴玉新改步銜詔出梨嶺方  
爲遠人慕旌旗滿流水冠蓋東門駐四坐共咨嗟疑侯不  
當去張仲稱孝友樊侯正求助名城雖云樂行矣未宜遽

悼四明杜醇

杜生四五十孝友稱鄉里隱約不外求耕桑有妻子藜杖



牧雞豚筠筒釣魴鯉歲時沽酒歸亦不乏甘旨天涯一杯  
飯夙昔相逢喜談辭足詩書篇詠又清泚都城問越客安  
否常在耳日月未渠央如何棄予死古風久凋零好學  
少爲已悲哉四明山此士今已矣

哭梅聖俞

詩行於世先春秋國風變衰始柏舟文辭感激多所憂律  
呂尚可諧鳴球先王澤竭士已偷紛紛作者始可羞其聲  
與節急以浮真人當天施再流篤生梅公應時求頌歌文  
武功業優經奇緯麗散九州眾皆少銳老則不翁獨辛苦  
不能休惜無采者人名道貴人憐公青兩眸吹噓可使高  
岑樓坐令隱約不見收空能乞錢助饋餼疑此有物司諸

幽棲棲孔孟葬魯鄒後始卓犖稱軻丘聖賢與命相楯矛  
勢欲強達誠無由詩人況又多窮愁李杜亦不爲公侯公  
窺窮阨以身投坎坳坐老當誰尤吁嗟豈卽非善謀虎豹  
雖死皮終畱飄然載喪下陰溝粉書軸幅懸無旒高堂萬  
里哀白頭東望使我商聲謳

遊章義寺

九日章義寺倦遊因解鑣拂榻寄午夢起尋北山椒岑蔚  
鳥絕迹悲鳴唯一蜩歡言與僧期於此共簞瓢斬松八九  
根窗壁具一朝伏檻何所見蒼蒼圍寂寥巖谷寒更靜水  
泉清不搖安得有車馬尚無漁與樵神茂真觀復心明眾  
塵消陰嶺有嘉客儻來不須招



飯祈澤寺

駕言東南遊午飯投僧館山白梅蘂長林黃柳芽短笞箬  
沙際來略約桑間斷春映一川明雪消千壑漫魚隨竹影  
浮鳥誤人聲散翫物豈能畱千時吾自懶

荅瑞新十遠

遠水悠然碧遠山天際蒼中有山水人寄我十遠章我時  
在高樓徙倚觀八荒亦復有遠意千載不相忘

送文學士倅邛州

文翁出治蜀蜀士始文章司馬唱成都嗣音得琳瑯犖犖  
漢寄孫千秋起相望操筆賦上林脫巾選爲郎擁書天祿  
閣奇字校偏傍忽乘駟馬車牛酒過故鄉時平無論檄不

訪碧雞祥問君行何爲關隴正繁霜中和助宣布循吏綴  
前芳豈待爲親榮區區夸一方

送宋中道倅涪州

漳水不灌鄴不知幾何時後世有史起乃能爲可爲余嘗  
憐洛民舄鹵半不治頗覺漳可引但爲談者嗤高議不同  
俗功成人始思夫子到官日勿忘吾此詩

送張公儀宰安豐

楚客來時雁爲伴歸期祇待春冰泮雁飛南北三兩回回  
首湖山空夢亂祕書一官聊自慰安豐百里誰復歎揚鞭  
去去及芳時壽酒千觴花爛漫

送陳諤



有司昔者患不公翻名騰書今故密論才相若子獨棄外  
物有命真難必鄉閭孝友莫如子我願卜鄰非一日朱門  
弈弈行多慚歸矣無爲惡蓬華

送孫長倩歸輝州

溪澗得雨潦奔溢不可航江海收百川浩浩誰能量溪澗  
之日短江海之日長願生菩提道德江海以自方

送喬執中秀才歸高郵

薄飯午不羹空爐夜無炭寥寥日避席烈烈風欺幔謂予  
勿惡此何爲向子歎長年客塵沙無婦助親爨寒暄慰白  
首我弟纔將冠迢迢歲又晚想見淮湖漫古人一日養不  
以三公換田園在戮力且欲歸鋤畔行矣子誠然光陰未

宜翫負米力有餘能無讀書伴

雲山詩送正之

雲山參差碧相圍溪水詰曲帶城陴溪窮壤斷至者誰子  
獨與子相諧熙山城之西鼓吹悲水風蕭蕭不滿旗子今  
去此來無時予有不可誰子規



王臨川全集卷九終

王臨川全集卷十

古詩

和甫如京師微之置酒

季子將北征貂裘解亭臯使君擁鳴騶出餞載酒醪作詩  
寵行色坐客多賢豪信知大夫才能賦在登高陟岷憂未  
已強歌反哀號問言歸何時逮此冬風饕川途良阻脩箠  
轡慎所操黃屋初啟聖萬靈歸一陶詢謀及疎賤拔取皆  
時髦往矣果有合可辭州縣勞

別孫莘老

逢原未熟我已與子相知自吾得逢原知子更不疑把手  
湖上舟望子欲歸時茫然乃分散獨背東南馳寥寥西城



居邂逅與子期雞鳴入省門朱墨來紛披含意不自得強  
顏聊爾爲會合常在夜青燈照書詩往往並衾語至明不  
言疲忽忽舍我去使我當從誰送子不出門我身方羈縻  
我心得自如今與子相隨隨子至湖上逢原所嘗嬉想見  
荷葉盡北風卷寒漪已懷今日愁更念昔日悲相逢亦何  
有但有鏡中絲

寄丁中允

寶臣

人生九州閒泛泛水中木漂浮隨風波邂逅得相觸始我  
與夫子得官同一州相逢皆偶然情義乃綢繆我於人事  
疎而子久矣修磨礪以成我德大不可隳乖離今六年念  
子未嘗休豈不道相逢但得頃刻留歡喜不滿顏長年抱  
離憂古人有所思千里駕車牛如何咫尺閒而不與子遊  
顧惜五斗米無辜自拘囚念彼磊落者心顏兩慙羞剡山  
碧榛榛剡水日夜流山行若無巖水淺亦可舟使君子所  
善來檄自可求何時子來意詩子南山頭

示平甫弟

汴渠西受崑崙水五月奔湍射黃矢高淮夜入忽倒流碕  
岸相看欲生觜萬櫂如山屹不動嗟我仲子行亦止自聞  
留連且一月每得問訊猶千里老工取河天上落伏礫遠  
沙卷無底土橋立馬望城東數日知有相逢喜牆隅返照  
媚槐穀池面過雨蘇篁葦欣然把手相與閑所願此時無  
一詭豈無他憂能老我付與天地從今始閉門爲謝載酒



人外慕紛紛吾已矣

憶北山送勝上人

蒼藤翠木江南山  
激激流水兩山間  
山高水深魚鳥樂  
車馬跡絕人長閑  
雲埋樵聲隔蔥蒨  
月弄釣影臨潺湲  
黃塵滿眼衣可濯  
夢寐惆悵何時還

相國寺啟同天節道場行香院觀戲者

侏優戲場中一貴復一賤  
心知本自同所以無欣怨

馬上轉韻

三月楊花迷眼白  
四月柳條空老碧  
年光如水儘東流  
風物看看又到秋  
人世百年無幾許  
何須戚戚長辛苦  
富貴功名自有時  
簞瓢捽茹亦山雌

乙巳九月登冶城作

欲望鍾山岑因知冶城路  
躋攀隱木杪稍記曾遊處  
紅沉渚上日蒼起  
榛中霧即事有哀傷  
山川自如故

過劉貢甫

去年約子遊山陂  
今者仍爲大梁客  
天旋日月不少留  
稱意人間寧易得  
天明徑欲相就語  
雲雪填城萬家白  
冬風吹鬣馬更驕  
一出何由問行迹  
能言奇字世已少  
終欲追攀豈辭劇枕中  
鴻寶舊所傳  
飲我寧辭酒  
或索吾願與  
子同醉醒顏狀雖殊  
心不隔故知  
今有可憐人  
回首紛紛斗簷窄

估玉



潼關西山古藍田有氣鬱鬱高拄天雄虹雌霓相結纏晝  
夜不散非雲煙秦人挾斤上其巔視氣所出深鑿鑄得物  
盈尺方且堅以斤試叩聲泠然持歸市上求百錢人皆疑  
嗟莫愛憐大梁老估聞不眠操金喜取走踟躕深藏牢包  
三十年光怪鄰里驚相傳欲獻天子無由緣朝廷昨日鐘  
鼓縣呼工琢圭寘神筵玉材細鎖不中權賈孫抱物詔使  
前紅羅複疊帕紫氈發視紺碧光屬聯詔問與價當幾千  
眾工讓口無敢先嗟我豈識真一作與全

信都公家白兔

水精爲宮玉爲田嫦娥縞衣洗朱鈿宮中老兔非日浴天  
使潔白宜嬋娟揚鬚彌足桂樹間桂花如霜亂後前赤鴉  
相望窺不得空凝兩瞳射日丹東西跳梁自長久天畢橫  
施亦何有憑光下視且罔繁衣褐紛紛漫回首去年驚墮  
滁山雲出入虛莽猶無羣奇毛難藏果亦得千里今以窮  
歸君空衢險幽不可返食君庭除嗟亦窘令予得爲此兔  
謀豐草長林且遊行

車螯二首

車螯肉甚美由美得烹燔殼以無味棄棄之能久存予嘗  
憐其肉柔弱甘咀吞又嘗怪其殼有功不見論醉客快一  
噉散投墻壁根寧能爲收拾持用訊醫門

二

車螯肉之弱恃殼保厥身自非身有求不敢微啟唇尚恐



搗者得泥沙常埋埋往往湯火間身盡殼空存維海錯萬  
物口牙且咀吞爾無如彼何可畏寧獨人無爲久自苦含  
匿不暴陳謐然從所如游蕩四海濬清波濯其汙白日曬  
其昏死生或有在豈遽得烹燔

與平甫同賦槐

冰雪泊楚岸萬株同飄零春風都城居初見葉青青歲行  
如車輪蔭翳忽滿庭秋子今在眼何時動江船

甘棠梨

甘棠詩所歌自足誇眾果愛其凌秋霜萬玉懸磊砢園夫  
盛採摘市賈爭包裹車輪動盈箱舟載輒連柁朝分不知  
數暮在知幾顆但使甘有餘何傷小而楸主人捐千金釘  
鉅留四坐楮棹與橙栗在口亦云可都城紛華地內熟易  
生火問客當此時緇煩孰如我

獨山梅花

獨山梅花何所似半開半謝荆棘中美人零落依草木志  
士顛顛守蒿蓬亭亭孤豔帶寒日漠漠遠香隨野風移栽  
不得根欲老回首上林顏色空

同昌叔賦雁奴

鴻雁無定棲隨陽以南北嗟哉此爲奴至性能懇惻人將  
伺其殆奴輒告之亟舉羣寤而飛機巧無所得夜或以火  
取奴鳴火因匿頻驚莫我捕顧謂奴不直嗷嗷身百憂泯  
泯眾一息相隨入贈繳豈不聽者惑偷安與受給自古有



亡國君看雁奴篇禍福甚明白

老樹

去年北風吹瓦裂墻頭老樹凍欲折蒼葉蔽屈忽扶疎野  
禽從此相與居禽鳴無時不可數雌雄各自應律呂我牀  
撥書當午眠能驚我眠聒我語古詩鳥鳴山更幽我念不  
若鳴聲收但憂此物一朝去狂風還來欺老樹

賦棗

得燭字

種桃昔所傳種棗予所欲在實爲美果論材又良木餘甘  
入鄰家尚得饒婦逐況余秋盤中快噉取饜足風包墮朱  
繒日顛皺紅玉贄享古已然幽詩白宜錄縞懷青齊間萬  
樹蔭平陸誰云食之昏匿知乃成俗廣庭觴聖壽以此參

有藪願比赤心投皇明儻予燭

飛雁

雁飛冥冥時下泊稻梁雖少江湖樂人生何必慕輕肥辛  
苦將身到沙漠漢時蘇武與張騫萬里生還值偶然丈夫  
許國當如此男子辭親亦可憐

寓言九首

誥誥古之士出必見禮樂羣游與羣飲仁義待揚摧心疲  
歌舞荒耳聒米鹽濁所以後世賢絕俗乃爲學

二

不得君子居而與小人游疵瑕不相摩况乃禍釁稠高語  
不敢出鄙辭強顏酌始云避世患自覺日已偷如傅一齊



人以萬楚人咻云復學齊語定復不可求仁義多在野欲  
從苦淹留不悲道難行所悲累身修

三

周公歌七月耕稼乃王術宣王道祖宗考牧與宮室甘棠  
能聽訟召伯聖人匹後生論常高於世復何實

四

婚喪孰不供貨錢免爾縈耕收孰不給傾粟助之生物羸  
我收之物窘出使營後世不務此區區挫兼并

五

正觀業萬世經營豈非艱其子一搖之宗廟靈幾殫開元  
始聰明一青犇岷山功高後毀易德薄人存難

六

言失於須臾百世不可除行失几一節間惡名滿八區百年  
養不足一日毀有餘諒彼恥不仁戒哉惟厥初

七

鐘鼓非樂本本末猶相因仁聲入人深孟子言之醇如何  
正觀君從古同隋陳風俗不粹美惜哉世無臣

八

遊鯨厭海濁出戲清江湄風濤助翻騰網罟不敢窺失身  
洲渚間螻蟻乘其棧物大苦易窮一窮無所歸

九

猛虎臥草間羣鳥從噪之萬物忌強梁寧獨以其私虎終



王臨川全集卷十  
七  
機械得鳥亦彈丸隨山雞不忤物默與鳳凰期

舟中讀書

冉冉木葉下蕭蕭山水秋浮雲帶田野落日抱汀洲歸臥  
無與語出門何所求未能忘感慨聊以古人謀

和王樂道讀進士試卷

文章始隋唐進取歸一律安知鴻都事竟用程人物變今  
嗟未能於已空自咄流波亦已漫高論常見屈故令傲儻  
士往往棄堙鬱臯陶敘九德固有知人術聖世欲爾爲徐  
觀異人出

自訟

孔子見南子子路爲不怡欲從公山氏勃鬱見色辭道如  
天之蒼萬物不能緇弟子尚不信況余乏才資明知古人  
仁語默各有時苟出不自慎果爲聽者疑白圭尚有磨  
馬猶能追一言成不智雖悔欲何爲

彼狂

上古杳默無人聲日月不忒山川平人與鳥獸相隨行祖  
孫一死十百生萬物不給乃相兵伏羲畫法作後程漁蟲  
獵獸寬羣爭勢不得已當經營非以示世爲聰明方分類  
別物有名夸賢尚功列恥榮盡僞日巧雕元精至言一出  
眾輒驚上智閉匿不敢呈因時就俗救別驟惜哉彼狂以  
文鳴強取色樂要聾盲震蕩沈濁終無清詭詭徒亂聖人  
氓豈若泯默死蠶耕



王臨川全集卷十一  
眾人

眾人紛紛何足競是非吾喜非吾病  
頌聲交作莽豈賢四國流言且猶聖  
唯聖人能輕重人不能銖兩爲千鈞  
乃知輕重不在彼要之美惡由吾身

王臨川全集卷十終

王臨川全集卷十一

古詩

寄題郢州白雪樓

折楊黃華笑者多陽春白雪和者少  
知音四海無幾人況乃區區郢中小  
千載相傳始欲慕一時獨唱誰能曉  
古心以此分冥冥俚耳至今徒擾擾  
朱樓碧瓦何年有棖桷連空欲驚矯  
郢人爛漫醉浮雲郢女參差躡飛鳥  
丘墟餘響難再得欄檻茲名復誰表  
我來欲歌聲更吞石城寒江暮雲繞

聖俞爲狄梁公孫作詩要予同作

虎豹不食子鴟梟不乘雄人惡甚鳥獸吾能與成功愛有



以計畱去有勢不容吾謀適合意幾亦齒姦鋒時恩淪九  
泉褒取異代忠堂堂社稷臣近世孰如公空使苗裔稱稱  
揚得詩翁一讀亦使我慨然想餘風

蒙亭

隱者委所逢在物無不足山林與城市語道歸一轍詩人  
論巨細此指尙局束頗知區區者自屏忍所欲孰識古之  
人超然遺耳目豈於喧與靜趣舍有偏獨命亭今何爲似  
乃畏驚俗至意不標揭小名聊自屬夏風簷楹寒冬雪牕  
戶燠春樊亂梅柳秋徑深松菊壺觴日笑傲裙屣相追逐  
此樂已難言持琴作新曲

和王樂道烘蝨

秋水汗流如炙輶敝衣濕蒸塵垢浣施施眾蝨當此時擇  
肉甘於虎狼餓咀嚙侵膚未云已爬搔次骨終無那時時  
對客輒自捫千百所除纔幾箇皮毛得氣強復活爪甲流  
丹真暫破未能湯沐取一空且以火攻令少挫踞爐熾炭  
已不暇對竈張衣誠未過飄零乍若蛾赴燈驚擾端如蟻  
旋磨欲毆百惡死焦灼肯貸一凶生棄播已觀細黠無所  
容未放老奸終不墮然臍郿塢患溢世焚寶鹿臺身易貨  
冢中燎入化秦屍池上愀隨遷莽坐彼皆勢極就煙埃況  
汝命輕侔涕唾逃藏壞絮尙欲索埋沒死灰誰復課一本無此  
八熏心得禍爾莫悔爛額收功吾可賀猶殘眾蟻恨未除  
自計寧能久安臥



和聖俞農具詩十五首

田廬

田父結田廬聊容一身息呼兒取茅竹不借鄉人力起行廬旁朝歸臥廬下夕悠悠各有願勿笑田廬窄

樵斧

百金聚一治所賦以所遭此豈異莫耶奈何獨當樵朝出在人手暮歸在人腰用捨各有時此日雨無邀

耕牛

朝耕草茫茫暮耕水滴滴朝耕及露下暮耕連月出自無一毛利主有千箱實院彼天上星空名豈余匹

水車

取車當要津膏澗及遠野與天常斡旋如雨自深瀉置心亦何有在物偶相假此理乃可言安得圓機者

牧笛

綠草無端倪牛羊在平地芊綿杳靄間落日一橫吹迢遙送逸響澶漫寫真意豈比賣錫人吹簫販童穉

颺扇

精良止如雷疏惡去如擯如擯非爾憎如雷豈吾吝無心以擇物誰喜亦誰愠翁乎勤簸颺可使糠粃盡

田漏

占星昏晚中寒暑已不疑田家更置漏寸晷亦欲知汗與水俱滴身隨陰屢移誰當哀此勞往往奪其時



牛衣

百獸冬自暖獨牛非毳毛無衣與卒歲坐恐得空牢主人  
覆護恩豈啻一綈袍問爾何以報離離滿東臯

糶種

富家種論石貧家種論斗富貧同一時傾瀉應心手行看  
萬壟空坐使千箱有利物博如此何慙在牛後

耒耜

耒耜見於易聖人取風雷不有仁智兼利端誰與開神農  
后稷死般爾相尋來山林盡百巧揉斲無良材

錢鋪

於易見耒耜於詩聞錢鋪百工聖人爲此最功不薄欲收

禾黍善先去蒿萊惡願同欹器悟更使臣工作

耨耪

鍛金以爲曲揉木以爲直直曲相後先心手始兩得秦人  
望屋食以此當金革君勿易耨耪耨耪勝鋒鏑

襪

采采霜露下披披煙雨中蒲茅以爲友袒褐相與同勿妬  
市門人綺紈被奴僮當慙邊城戍擐甲徂春冬

臺笠

史記索隱謂蓬累笠也

耕有春雨濡耘有秋陽暴二物應時須九州同我服欲爲  
生少慕得此白云足君思周伯陽所願豈華轂

耘鼓



王臨川全集卷十一  
四  
逢逢戲場聲攘攘戰時伍日落未云休田家亦良苦問兒  
今壟上聽此何莽鹵昨日應官繇州前看歌舞

次韻酬微之贈池紙并詩

微之出守秋浦時椎冰看擣萬穀皮波工龜手咤今樣魚  
網肯數荊州池霜紈奪手賈不售虹玉喪氣山無輝方船  
穩載獻天子善價徐取供吾私十年零落尚百一持以贈  
我隨清詩君寧久寄金穀地方執賜筆磨坳螭當畱此物  
朝上國日侍帝側書新儀不然名山副史本褒拔元凱誅  
窮奇咨予文章非世用畫鏤空爾糜冰脂揮毫才足記姓  
字竊學又恥從師宜忽忽黠汙亦何忍嘉貺但覺難爲辭  
篇終有意責趙璧窮國恐誤連城歸傾囊倒篋聊一報安

敢坐以秦爲雌

酬沖卿月晦夜有感

夜雲不見天況乃星與月蕭蕭暗塵走坎坎寒更發樓歌  
客尚飲酩酊不畏雪巷哭復有人鄰風送幽咽紛然各所  
遇悲喜孰優劣君方感莊周浩蕩擺羈絢歸來亦置酒玉  
指調絃撥獨我坐無爲青燈對明滅

送子思兄參惠州軍

云云曲江水天借九秋色樓臺飛半空秀氣盤韶石載酒  
填里閭吹花換朝夕笙簫震河漢錦繡爛冠幘地靈瘴癘  
絕人物傾南極先朝有名臣臥理訟隨息稍稍延諸生談  
笑與賓客子來適妙年謁入交履烏寂寥九齡後此獨望



一國虞翻禮丁汜韓愈俟趙德孤岸鎮頽波俗流未易識  
我方文葆中旋逐旌旗蹟去思今豈忘耳目孰遺迹吏舍  
殷勤言俛仰問乖隔當時府中兒侵尋鬢邊白下帷雖著  
書不抹寒饑迫謂宜門闕士宦路久烜赫奈何猶差池更  
捧丞掾檄驥摧千里蹄鵬墮九霄翮人生無巧愚天運有  
通塞試觀馳騁人意氣宇宙窄榮華去路塵謗辱與山積  
優游祿仕間較計誰失得送君強成歌陟岵翻感激

送董伯懿歸吉州

我來以喪歸君至因謫徙蒼黃憂患中邂逅過於此去年  
服初除聽赦相助喜看君數歸月但屈兩三指茫然冬更  
秋一笑非願始籃輿楊柳下明月芙蓉水僮饑屢闕門客

罷方隱凡是非評眾詩成敗斷前史時時對奕石漫浪爭  
生死送迎皆幅巾設食但陳米亦曾戲篇章揮翰疾嚙矢  
君豪才有餘我老憊先止東城景陽陌南望長干紫欲斲  
三畝蔬於焉寄殘齒經過許後日唱和猶在耳新恩忽捨  
我欣悵生彼已江湖北風帆捩掩卽千里相逢知何時莫  
惜縑與紙

八月十九日試院夢冲卿

空庭得秋長漫漫寒露入幕愁衣單喧喧人語已成市白  
日未到扶桑間永懷所好卻成夢王色髣髴開心顏逆知  
後應不復隔談笑明月相與閒

平甫歸飲



無田土相弔亦以廢燕樂我官雖在朝得飲乃不數詩書  
向牆戶賓至無杯杓空取上古言醜之等糟粕有如楊子  
雲歲晚天祿閣但無載酒人識字真未博叔兮歸自東一  
笑堂上酌緒餘不及客兒女聊相酢高談非世歡自慰亦  
不惡寄言繁華子此趣由來各

答陳正叔

天馬志萬里駕鹽不如閑壯士困局束不如棄之宗利行  
有阨轍勢涉無恬瀾明明千年羞促促一日歡孰肯避此  
世引身取平寬超然子有意爲我歌考槃子方慕孔氏委  
吏久盤桓得失未云殊聊各趨所安

過食新城藕

他年過食新城藕枕藉船中載親友今年卻到經行處獨  
坐昏煙對舞柳甘酸向口無所適牢落盤餐與樽酒冰房  
玉節漫自好欲御還休涕垂手曾參宦學居常近陽城離  
別初不久人閒此願兩未能西風落日空回首

明州錢君倚眾樂亭

侯君幕府開東部名高海曲人知慕艤船談笑政卽成洗  
滌山川作嘉趣平泉浩蕩銀河注想見明星弄機杼載沙  
築成天上路投虹爲橋取孤嶼掃除荆棘水中央碧瓦朱  
甍隨指顧春風滿城金版舫來看置酒新亭上百女吹笙  
綵鳳悲一夫伐鼓靈鼉壯安期羨門相與遊方丈蓬萊不  
更求酒醕忽跨鯨魚去陳迹空令此地畱



愛日

雁生陰沙春冬息陽海溼冥冥取南北豈以食為累咨予  
愁病軀朴鄙人所戲無才治時難量力當自棄豈知塞上  
霜飄然亦何事高堂已白髮愛日負明義悲風吹平原秣  
馬聊一榻含懷孰與語仰屋思歎喟孟母知身從萊妻恥  
人制一肉儻易謀萬鍾非得計

荅裴煜道中見寄

君遊苦數歸苦晚一驛險有千里遠知君陟降日暮聞馬  
力不勁厭長坂雨脚墜地花枝低風頭入溪蒲葉偃此處  
登臨不奈愁瓊樹森森遮疊巘

餘寒

餘寒駕春風入我征衣裳捫鬢祇得凍蔽面尚疑創土耳  
恐猶墜馬毛欲吹僵牢持有失箸疾飲無畱湯噉噉扶桑  
日出有萬里光可憐當此時不濕地上霜冥冥鴻雁飛北  
望去成行誰言有百鳥此鳥知陰陽豈時有必至前識聖  
所臧把酒謝高翰我知思故鄉

孤城

孤城回望一作首距幾何記得好處常經過最思東山煙樹  
色更憶南湖秋水波百年顛倒一作三如夢寐萬事乖隔  
一作萬事感激徒悲歌應須飲酒不復道今夜江頭明月多

和微之藥名勸酒

赤車使者錦帳郎從容珂馬畱闌坊紫芝眉宇傾一坐笑



語但聞雞舌香藥名勸酒詩實好陟釐爲我書數行眞珠  
的皜鳴糟牀金罍琥珀正可嘗史君子細看流光莫惜覓  
醉衣淋浪猶醒至死誠可傷歡華易盡悲酸早人閒沒藥  
能醫老寄言歌管眾少年趁取烏頭未白前

客至當飲酒二首

結屋在牆陰閉門讀詩書懷我平生友山水異秦吳杖藜  
出柴荆豈無馬與車窮通適異趣談笑不相愉豈復求古  
人浩蕩與之俱客至當飲酒日月無根株

二

天提兩輪光環我屋角走自從紅顏時照我至白首纍纍  
地上土往往平生友少年所種樹礫砢行復朽古人有眞

意獨在無好醜冥冥誰與論客至當飲酒

乙未冬婦子病至春不已

天旋無窮走日月青髮能禁幾回首兒呻婦嘆冬復春強  
欲笑歌難發口黃卷幽尋非貴嗜藜牀穩臥雖貧有二物  
長乖亦可憐一生所得猶多苟

強起

寒堂耿不寐轆轤聞車聲不知誰家兒先我霜上行歎息  
夜未央遽呼置前楹推枕欲強起問知星正明昧旦聖所  
勉齊詩有雞鳴嗟予以竊食更覺負平生

飲裴侯家

裴侯飲我日向中四坐賓客顏皆紅掃除高館邀我入自



出糶麥憐民窮天邊眼力破萬里桑麻冥冥山四起野心  
採尋殊未已更欲滌衣北城水忽見碧樹櫻桃懸下馬恣  
食不論錢赤星磊落入我眼恐是半醉遊青天裴侯方坐  
塵沙裏沒身救物當如此我曹偶脫簿領閒何忍愛惜一  
日閒且歸拂席飽眠睡明日更看滁南山

送謝師宰赴任楚州

珠玉不自貴故爲人所憐賢愚亦如此好惡有自然聞子  
欲東南使我抱幽悵炎風沙土中甘與子留連大梁非無  
客跪起廢食眠相看獨不厭以此知子賢衰氣已難強壯  
心方少年才高豈易得勗子在雕鐫

二

崑崙一支流向東七月八月船如風愛君少壯此行樂恨  
我留連成老翁伸頭兩岸水無窮伏檻荷花滿地紅當時  
不得君攜手今日山川在眼中

次韻遊山門寺望文脊山

宣城百山閒文脊尤奇峰拔出飛鳥上圖畫難爲容聞昔  
有幽人捫蘿追赤松遺形此古室孤坐鹿裘重人去邈不  
反洞壑空藏龍側行蒼崖煙俯仰求靈蹤遊者如可得甘  
棄萬戶封安能久塵土傾倒相迎逢

車螯

海於天地間萬物無不容車螯亦其一埋沒沙水中獨取  
常苦易衛生乏明聰機緘誰使然含蓄略相同坐欲腸胃



王臨川全集卷十一  
得要令湯火攻置之先生盤噉客爲一空蠻夏怪四坐不  
論穀之功狼籍堆左右棄置任兒童何當強收拾持問大  
醫工

疥

浮陽燥欲出陰濕與之戰燥濕相留連蟲出乃投間搔膚  
血至股解衣燎鑪炭方其愜心時更自無可患呼醫急治  
之莫惜千金散有樂卽有苦愜心非所願

王臨川全集卷十一終

王臨川全集卷十二

古詩

和平甫舟中望九華山二首

楚越千萬山雄奇此山兼盤根雖巨狀其末乃脩纖去縣  
尚百里側身勇前瞻蕭條煙嵐上縹緲浮青尖徐行稍復  
逼所矚亦已添精神去疊疊氣象來漸漸卸席取近岸移  
船傍蒼蘂窺觀坐窮晡未覺晷刻淹江空萬物息四面波  
瀾恬峩然九女鬟爲出一鏡匱臥送秋月沒起看朝陽暹  
遊氛蕩無餘瑣細得盡覘陵空翠纛直照影寒鋸銛冢木  
立紺髮崖林張紫髯變態生倏忽雖神詎能占當留老吾  
身少駐誰云屢惜哉秦漢君黃屋上衡濤等之事嬉遊捨



三石川全集卷十一  
此何其廉我疑二后荒神物久已厭埋藏在雲霧不欲登  
昏儉又疑避衰封蔽匿以爲謙或是古史書脫落簡與籤  
當時備巡遊今不在細練終南秦之望泰山魯所詹天王  
與秩祭俎豆羅醢鹽苟能澤下民維此遠亦沾方今東南  
旱土脉燥不黏尚無膚寸功豈免竊食嫌神莽吾難知士  
病吾能破文章巧傳會智術工飛箝薦寶互珪璧論材自  
梗楛苟以飾婦妾謬云活蒼黔豈如幽人樂茲山謝閭閣  
穴石作戶牖垂泉當門簾尋奇出後徑覽勝倚前簷超然  
往不返舉世徒咕咕高興寄日月千秋伴烏蟾遐追商洛  
翁秦火不能炎近慕楚穆生意脫楚人鉗吾意竊所尚人  
謀諒難僉

二

誰謂九華遠吾身未嘗詹唱篇每起予予口安能箝憶在  
秋浦北空江上新蟾光潔寫一鏡迴環兩堤奩露坐引衣  
襪風行欹帽簷維舟當此時巨細得盡瞻試嘗論大略次  
乃述微纖此山廣以深包畜萬物兼噓雲吐霧雨生育靡  
不漸巍然如九皇德澤四海沾此山相後先各出羣峯尖  
毅然如九官羅立在堂廉挺身百辟上附麗無姦儉此山  
高且寒五月不覺炎草樹萋已綠冰霜尚涵淹頽然如九  
老白髮連蒼髯此山當無雲秀色鬱以添姹然如九女靚  
飾出重簾珮環與巾裙紺玉青紈縑遠之妍西施近或醜  
無鹽變態不可窮詩者徒咕咕我初勇一往役世難安恬



浪荒不走職民瘼當誰矜乖離今數旬夢想欲窺覘自期  
得所如何帝釋囚鉗念昔太白巔下視海日暹竭來天柱  
遊屐齒尚苔黏猶之健飲食屢饗亦云饜胡爲慕攀躋已  
憊且不嫌豈其仁智心山水固所潛男兒有所學進退不  
在占功名苟不諧廊廟等閭閻況乃論椽杙其誰辨楸枿  
歸歟巖崖居料理帶與籤得石坐兀兀逢泉飲厭厭取舍  
斷在獨豈必詢謀僉子語實慰我寧殊邑中黔玉枝將在  
山當倚以葭蒹詩力我已屈鋒鏃子猶銛扶復更一戰語  
汝其無謙

和中甫兄春日有感

雪釋沙輕馬蹄疾北城可遊今暇日濺濺溪谷水亂流漠

漠郊原草爭出嬌梅過雨吹爛漫幽鳥迎陽語啾唧分香  
欲滿錦樹園翦綵休開寶刀室胡爲我輩坐自苦不念茲  
時去如失飽開高逕動車輪甘臥空堂守經帙淮蝗蔽天  
農久餓越卒圍城盜少逸至尊深拱罷簫韶元老相看進  
刀筆春風生物尚有意壯士憂民豈無術不成歡醉但悲  
歌回首功名古難必

信陵坊有籠山樂官

萬里山林姿羽毛何璀璨鳴聲應律呂唯有知者愛都門  
市井兒誰翫汝文采應須鎖樊籠勿受丸矰害

收鹽

州家飛符來比櫛海中收鹽今復密窮囚破屋正嗟歛吏



三國川集卷十一  
兵操舟去復出海中諸島古不毛島夷爲生今獨勞不煎  
海水餓死爾誰肯坐守無亡逃爾來賊盜往往有劫殺賈  
客沈其艘一民之生重天下君子忍與爭秋毫

### 省兵

有客語省兵兵省非所先方今將不擇獨以兵乘邊前攻  
已破散後距方完堅以眾亢彼寡雖危猶幸全將旣非其  
才議又不得專兵少敗孰繼胡來飲秦川萬一雖不爾省  
兵當何緣驕惰習已久去歸豈能田不田亦不桑衣食猶  
兵然省兵豈無時施置有後前王功所由起古有七月篇  
百官勤儉慈勞者已息肩游民慕草野歲熟不在天擇將  
付以職省兵果有年

### 發廩

先王有經制頒賚上所行後世不復古貧窮主兼并非民  
獨如此爲國賴以成築臺尊寡婦入粟至公卿我嘗不忍  
此願見井地平大意苦未就小官苟營營三年佐荒州市  
有棄餓嬰駕言發富藏云以救鰥惻崎嶇山谷間百室無  
一盈鄉豪已云然罷弱安可生茲地昔豐實土沃人良耕  
他州或皆窳貧富不難評豳詩出周公根本詎宜輕願書  
七月篇一寤上聰明

### 感事

賤子昔在野心哀此黔首豐年不飽食水旱尚何有雖無  
剽盜起萬一旦不久特愁吏之爲十室災八九原田敗粟



麥欲訴嗟無賦問關幸見省笞扑隨其後況是交冬春老  
弱就僵仆州家閉倉庾縣吏鞭租負鄉鄰銖兩徵坐逮空  
南畝取貲官一毫姦桀已云富彼昏方怡然自謂民父母  
竭來佐荒郡懍懍常慚疚昔之心所哀今也執其咎乘田  
聖所勉況乃余之陋內訟敢不勤同憂在僚友

美玉

美玉小瑕疵國工猶珍之大賢小玷缺良交豈其絕小缺  
可以補小瑕可以磨不補亦不磨人爲奈爾何

寄曾子固

吾少莫與合愛我君爲最君名高山嶽嶂嶸嵩與太低心  
收眷友似不讓塵壒又如滄江水不逆溝畎澮君身揭日

月遇輒破氛靄我材特窮空無用補倉廩謂宜從君久垢  
污得泯汰人生不可必所願每顛沛乖離五年餘牢落千  
里外投身落俗穽薄宦自鉗欽平居每自守高論從誰丐  
搖搖西南心夢想與君會思君挾奇璞願售無良僧窮閭  
抱幽憂凶禍費禳禱州窮吉士少誰可壻諸妹仍聞病連  
月醫藥誰可賴家貧奉養狹誰與通貨貝詩人刺曹公賢  
者荷戈祓奈何遭平時德澤盛汪濊鸞鳳鳴上下萬羽來  
颺颺呦呦林間鹿爭出噬苹藜方令高世事動輒遭狼狽  
人事旣難了天理尤茫昧聖賢多如此自古云無奈周人  
貴婦女扁鵲名醫滯今世無常勢趨舍唯利害而君信斯  
道不閔身窮泰弃捐人間樂濯耳受天籟諒知安肥甘未



三石川全集卷十一  
五  
肯顧糠糲龍螭雖蟠屈不慕虵蟬蛻令人重感奮意勇忘  
身最何由日親炙病體同砭艾功名未云合歲月尤須惕  
懷思切劘劼中夜淚霽霈君嘗許過我早晚治車軌山溪  
雖峻惡高眺發蒙肺峯巒碧參差木樹青晚藹桐江路尤  
駛飛槳下鳴瀨魚村指暮火酒舍瞻晨旆清醪足消憂玉  
鯽行可膾行行願無留日夕佇傾蓋會將見顏色不復謀  
著蔡延陵古君子議樂恥言鄙細事豈足論故欲論其大  
披披發鞬囊懷懷見戈銳探深犯巖壁破惑翻強旰離行  
步荃蘭偶坐蔭松檜宵牀連衾幃晝食共麤糲茲歡何時  
合清瘦見衣帶作詩寄微誠誠語無綵繪

同杜使君飲城南

山公遊何處白馬鳴翩翩檀那十畝碧五月浮寒烟留客  
聽其間風吹江海縣出罇不見口竹外空青天焚蠟助月  
出酒光發金船狂客惜不去醉翁舞回旋何必吹簫人玉  
枝自嬋娟歸路借紅燭雨星低馬前

有感

憶昔與胡子戲娛西城幽放斥僕與馬獨身步田疇牛豎  
歌我旁聽之爲久留一接田父語嘆之勝王侯追逐恨不  
恣暮歸輒懷愁願常輕千乘祗願足一丘子時怪我少好  
此寂寞遊笙簧不入耳又不甘醪羞那知抱孤傷罷頓不  
能道世味已鮮少但餘野心稠乖離今年斑髮滿我頭  
昔興亦略盡食眠常百憂每逢佳山水欲往輒復休方壯



遂如此況乃高春秋

送孫叔康赴御史府

古人喜經綸萬事慚強聒時來上青冥俯仰但一節危言  
回丘山聲利盡毫末由來治亂體宿昔心已達肯隨俗好  
惡議論輕自決遣風何寥寥夢寐待豪傑天書下東南趣  
召赴巖闕長材晦朝倫高行隱家闕新除疇問望宿蘊行  
施設念吾非忘形此理未易說

別馬祕丞

伯夷惡一世季也皆鄉人吾嘗論夫子有似李之倫人情  
路萬殊近世頗荆榛唯君遊其間坦坦得所循意君誠愷  
悌慕向從宿昔奈何初相懽鷓首已云北莓莓郊原青漠

漠風雨黑冠蓋滿津亭君今去何適

到郡與同官飲

時倅舒州

瀉碧沄沄橫帶郭浮蒼靄靄遙連閣草木猶疑夏鬱蔥風  
雲已見秋蕭索荒歌野舞同醉醒水果山肴互酬酢自嫌  
多病少懽顏獨負嘉賓此時樂

自舒州追送朱氏女弟憩獨山館宿木瘡僧舍明日

度長安嶺至皖口

晨霜踐河梁落日憩亭臯念彼千里行惻惻我心勞攬轡  
上層岡下臨百仞濠寒流咽欲絕魚鼈久已逃暮行苦遭  
迴細路隱蓬蒿驚麕出馬前鳥駭亡其曹投僧避夜雨古  
檠昏無膏山木鳴四壁疑身在波濤平明長安嶺飛雪忽



滿袍天低浮雲深更覺所向高

招同官遊東園

青青石上蘂霜至亦已凋冉冉水中蒲爾生信無聊感此  
歲云晚欲懽念誰邀嘉我二三子爲回東城鑣幽菊尚可  
泛取魚繫榆條母爲百年憂一日以逍遙

九日隨家人遊東山遂遊東園

暑往詎幾時涼歸亦云暫相隨東山樂及此身無憾聊回  
清池施更伏荒城檻采采黃金花持杯爲君泛

秋懷

城南平野寒多露窻壁含風秋氣度鄰桑槭槭已欲空悲  
蟲啾啾促機杼柴門半掩掃烏迹獨抱殘編與神遇韓公

既去豈能追孟子有來還不拒

既別羊王二君與同官會飲於城南因成寄

用藥名

赤車使者白頭翁當歸入見天門冬與山久別悲忽忽澤  
瀉半天河漢空羊王不留行薄晚酒肉從容追路遠臨流  
黃昏席未卷玉壺倒盡黃金盞羅列當辭更繾綣預知子  
不空青眼嚴徐長卿誤推挽老年揮翰天子苑送車陸續  
隨子返坐聽城雞腸宛轉

試茗泉

此泉地何偏陸羽曾未括坻沙光散射竇乳甘潛洩靈山  
不可見嘉草何由啜但有夢中人相隨掬明月

躍馬泉



古木縮蛟螭憎山欲墮突山祇來伐之半嶺跳齧膝玉珂  
鳴寒空組練光照日崩騰赴不測一陷常萬匹神戰異人  
間千秋爲儵忽泉傍往來客夜寄幽人室但聽鳴蕭蕭何  
田見神物

白紵山

白紵眾山巔江湖所縈帶浮雲卷晴明可見九州外肩輿  
上寒空置酒故人會峰巒帳錦繡草木吹竽籟登臨信地  
險俯仰知天大畱歡薄日晚起視飛鳥背殘年苦局束往  
事嗟摧壞歌舞不可求桓公井空在

七星硯

余聞星墮地往往化爲石石上有七星此理余莫測持來  
當白日光彩不爲匿恍如起鴻濛俛仰帝垣側當由偶然  
似見取參筆墨豪心蕩珍異樂以萬金得南工始爲僞傳  
合巧無隙亦時疑世人故自有能識

九鼎

禹行掘山走百谷蛟龍竄藏魑魅伏心誌幽妖尚覲隙以  
金鑄鼎空九牧治雲赤天漲爲黑韞風餘吹山拔木鼎成  
聚觀變怪素夜人行歌鬼晝哭功施元元後無極三姓衛  
守相傳屬弱周無人有宜出沈之九幽折地軸始皇區區  
求不得坐令神姦窺邑屋

九井得盈字

浚崖涉澗三十里高下犖确無人耕捫蘿挽葛到山趾仰



見吹瀉何崢嶸餘聲投林欲風雨末勢卷土猶溪阮飛蟲  
凌兢走獸頓霜雪夏落雷冬鳴野人往往見神物鱗甲漠  
漠雲隨行我來立久無所得空數石上菖蒲生中官繫龍  
沉玉冊小吏磔狗澆銀觥地形偶爾藏險怪天意未必司  
陰晴山川在理有崩竭丘壑自古相虛盈誰能保此千世  
後天柱不折泉常傾

寄題眾樂亭

陵陽遊觀吾所好恨不卽過眾樂亭嘗聞髣髴如夢寐吟  
筆自欲圖丹青千峰秀出百里外忽於其上崢嶸楹朝雲  
噓岳日曖曖夜水落澗風泠泠春花窈窕鳥爭舞夏木蔭  
鬱猿哀鳴潦收葉落天地爽海月影到山川明籃輿晨出  
誰與適坐與萬物觀虛盈令思民事不忍後田閒笑語催  
蠶耕吏休歸舍獄訟少墟落飲酒欲秋成唯愁一日奪令  
去出來老稚交逢迎彼民安知方祿仕徒喜使我寬逋征  
令知道義士林服遺愛豈用吾詩評

書會別亭

西城路居人送客西歸處年年借問去何時今日扁舟從  
此去春風吹花落高枝飛來飛去不自知路上行人亦如  
此應有重來此處時

題舒州山谷寺石牛洞泉穴

皇祐三年九月十六日

山谷乾元寺宿與道人文鏡弟安國擁火遊石牛  
洞見李翺習之書听泉久之明日復遊乃刻習之  
後



水泠泠而北出山靡靡而旁圍欲窮源而不得竟悵望以空歸

王臨川全集卷十二終

王臨川全集卷十三

古詩

泊舟姑蘇

朝遊盤門東暮出閶門西四顧茫無人但見白日低荒林帶昏煙上有歸鳥啼物皆得所託而我無安棲

崑山慧聚寺次孟郊韻

僧蹊蟠青蒼莓苔上秋狀露翰饑更清風蘄遠亦香掃石出古色洗松納空光久遊不忍還迫迕冠蓋場

如歸亭順風

春江窈窕來無地飛帆浩浩窮天際朝出吳川夕霽溪回首喬林吹岸薺柁師高臥自嘯歌戲彼挽舟行復止人生



萬事反覆多道路後先能幾何

垂虹亭

三江五湖口地與天不隔日月所蔽虧東西泐然白漫漫  
浸北斗浩浩浮南極誰投此虹蜺欲濟兩間阨中流雜蜃  
氣欄楯相本翼初疑神所爲滅沒在頃刻晨興坐其上傲  
兀至中昃猶憐變化功不謂因人役令君持酒漿談笑顧  
賓客頗誇九州物壯麗此無敵熒煌丹沙村璀璨黃金壁  
中家不慮始助我皆豪殖喟予獨感此剝爛有終極改作  
不可無還當采民力

張氏靜居院

勤者利進爲靜者樂正居物性有偏得惟賢時卷舒張侯  
始出仕所至多名譽老矣歸偃休買地斷荒蕪屋成爲令  
名名實與時俱南堂棲幽真晨起瞻像圖北堂畫五禽游  
戲養形軀燕有諸賓庭學有諸子廬問侯年幾何矯矯八  
十餘問侯何能爾心不藏憂愉問侯客何爲弦歌飲投壺  
問侯兒何讀夏商及唐虞嵩山填門戶洛水遶階除疾於  
山水間結駟有通衢我念老退者古多賢大夫畱侯亦養  
生乃欲凌空虛閉門不飲酒豈異山中臞疎傳稍喜客揮  
金能自娛不聞喜教子滿屋青紫朱張侯能兼取勝事古  
所無褒稱有樂石丞相爲之書而我不自量聞風亦歌呼

丙戌五日京師作二首

北風閣雨去不下驚沙蒼茫亂昏曉傳聞城外八九里霽



大如拳死飛鳥

二

浮雲離披久不合太陽獨行乾萬物誰令昨夜雨  
霧霏北風蕭蕭寒到骨

荅客

士常疑西伯何至羨里辱瞽鯀親父子尚脫井廩酷昏主  
雖聖臣飛禍安可卜致命遂其志雖窮不為戮

次韻唐彥猷華亭十詠

顧林亭野干所居也

寥寥湖上亭不見野王居平林豈舊物歲晚空扶疎自古  
聖賢人邑國皆丘墟不朽在名德千秋想其餘

寒穴

神農冽冰霜高穴與雲平空山渟千秋不出嗚咽聲山風  
吹更寒山月相與清北客不到此如何洗煩醒

吳王獵場

吳王好射虎但射不操戈匹馬掠廣場萬兵助遮羅時平  
事非昔此地桑麻多猛獸亦已盡牛羊在田坡

始皇馳道

穆王得八駿萬事得期修茫茫萬載間復此好遠遊車輪  
與馬跡此地亦嘗雷想當治道時勞者尸如丘

柘湖湖中有山生柘故名柘湖記云秦育女入湖為神今有廟

柘林著湖山菱葉蔓湖濱秦女亦何事能為此湖神年年



賽雞豚漁子自知津幽妖窟險阻禍福易欺人

陸瑁養魚池

野人非昔人亦復水上居紛紛水中游豈是昔時魚吹波  
浮還沒競食糟糠餘吞舟不可見守此歲月除

華亭谷

水行三百里入松江

巨川非一源源亦在眾流此谷乃清淺松江能覆舟蟲魚  
何所知上下相沉浮徒嗟大盈北浩浩無春愁華亭水自  
大盈入松江而北  
入海

陸機宅

故物一已盡嗟此歲年深野桃自著花荒棘自生鍼辛茅  
谷水陽鬱鬱崑山陰俛仰但如昨遊者不可尋

崑山

世傳陸氏家生機雲  
故名崑山言生玉也

玉人生此山山亦傳此名崖風與穴水清越有餘聲悲哉  
世所珍一出受敬傾不如鶴與猿棲息尚全生

三女岡

吳王莽三女於此

自古世士雄慷慨擅功名當時豈有力能使死者生三女  
共一丘此憾亦難平音容若有作無力傾人城

太白嶺

太白巖從東南馳眾嶺環合青紛披煙雲厚薄皆可愛樹  
石疎密自相宜陽春已歸鳥語樂溪水不動魚行遲生民  
何由得處所與茲魚鳥相諧熙

秃山



吏役滄海上瞻山一停舟怪此禿誰使鄉人語其由一狙  
山上鳴一狙從之遊相匹乃生子子眾孫還稠山中草木  
盛根實始易求攀挽上極高屈指亦窮幽眾狙各豐肥山  
乃盡侵牟攘爭取一飽豈暇議藏收大狙尚自苦小狙亦  
已愁稍稍受咋嚙一毛不得畱狙雖巧過人不善操勦擾  
所嗜在果穀得之常似偷嗟此海山中四顧無所投生生  
未云已歲晚將安謀

贈曾子固

曾子文章眾無有水之江漢星之斗挾才乘氣不媚柔羣  
兒謗傷均一口吾語羣兒勿謗傷豈有曾子終皇皇借令  
不幸賤且死後日猶爲班與揚

鮑公水

村南鮑公山山北鮑公水高穴逗遠源泠泠落山嘴玉色  
與飴味不可他味比竹樹四蒙密翠藤相披靡漫郎昔少  
年幽居得之此臨窺若有遇愛歎無時已浮名未汗染永  
矢終焉爾奈何中棄人長安十年風塵化舊顏謹囂滿耳  
不可洗此水泠泠空在山

寄李士寧先生

樓臺高聳間晴霞松檜陰森夾柳斜渴愁如箭去年華陶  
情滿滿傾榴花自嗟不及門前水流到先生雲外家

僧德殊家水簾求予詠

淙淙萬音落石顛皎皎一派當簷前清風高吹鸞鶴唳白



日下照蛟龍，凝浮雲妝額。自能卷缺月，琢鉤相與縣朱門。  
試問幽人價翡翠，鮫綃不值錢。

杭州修廣師法喜堂

浮屠之法與世殊，洗滌萬事求空虛。師心以此不挂物，一  
堂收身自有餘。堂陰置石雙嶒嶸，石腳立竹青扶疎。一來  
已覺肝膽豁，況乃宴坐窮朝晡。憶初救時勇自許，壯大看  
俗尤崎嶇。豐車肥馬載豪傑，少得志願多憂虞。始知進進  
各有理，造次未可分賢愚。會將築室返耕釣，相與此盧吟  
山湖。

復至曹娥堰寄剡縣丁元珍

溪水渾渾來自北，千山抱水清相射。山深水急無艇子，欲  
從故人安可得。故人昔日此水上，罇酒扁舟慰行役。津亭  
把手坐一笑，我喜滿懷君動色。論新講舊惜未足，落日低  
徊已催迫。我心自醉不復飲，秋果寒花空滿席。今年卻坐  
相逢處，怊悵難求別時迹。可憐溪水自南流，安得溪船問  
消息。

荅曾子固南豐道中所寄

吾子命世豪術學，窮無間直意。慕聖人不問閔，與顏彼昏  
何爲者。誣搆來顛顛，應逮犯秋陽。動爲人所歎，不卹我躬  
瘁。乃嗟天澤慳，令人念公卿。燁燁趨王班，泊無憫世意。狙  
猿而佩環，愛子所守卓。憂予不能攀，永矢從子游。合如屣  
上，瓊願言借餘力，迎浦疎潺潺。亦有衣上塵，可攀裨泰山。



大江秋正清島激相縈鬱四盼浩無主日暮煙霞斑水竹  
密以勁霜楓衰更殷賞託亦云健行矣非間關相期東北  
遊致館淮之灣無爲襲甯羸悠然及溫還

寄贈胡先生

并序

孔孟去世遠矣信其聖且賢者質諸書焉耳翼之先生與  
予竝世非若孔孟之遠也聞薦紳先生所稱述又詳於書  
不待見而後知其人也歎慕之不足故作是詩

先生天下豪傑魁膺臆廣博天所開文章事業望孔孟不  
復睥睨蔡與崔十年留滯東南州飽足藜藿安蒿萊獨鳴  
道德警此民民之聞者源源來高冠大帶滿門下奮如百  
蟄乘春雷惡人沮服善者起昔時躑躅今驚回先生不試

乃能爾誠令得志如何哉吾願聖帝榮太平補葺廊廟枝  
傾頽披旒發纒廣耳日照徹山谷多遺材先收先生作梁  
柱以次構架桷與椽羣臣面向帝深拱仰戴堂陛方崔嵬

得曾子固書因寄

始吾居揚日重問每見及云將自親側萬里同講習子行  
何舒舒吾望已汲汲窮年夢東南顏色不可挹仁賢豈欺  
我正恐事維繫巖親抱憂衰生理賴以給不然航江外天  
寒北風急無乃山路惡僕弱馬行澁孤懷未肯開歲物忽  
如蟄竭來高郵住巷屋頗卑濕蓬蒿稍芟除茅竹隨補葺  
苟云禦風氣尚恐憂雨汁故人莫在眼屢獨開巾笈忠信  
蓋未見吾敢誣茲邑出關誰與語念子百憂集眺聽聊自



放日暮城頭立徐歸坐當戶使者操書入時開識子意如  
渴得美酒驪駒日就道玉手行可執舊學待鐫磨新文得  
刪拾重登城頭望喜氣滿原隰

寄虔州江陰二妹

貢水日夜下下與章水期我行二水間無日不爾思飄若  
越鳥北心常在南枝又如歧首蛇南北兩欲馳逝者日已  
遠百憂詎能追生存苦乖隔邂逅亦何時女子歸有道善  
懷見於詩庶云畱汝車慰我堂上慈

登越州城樓

越山長青水長白越人長家山水國可憐客子無定宅一  
夢三年今復北浮雲縹緲抱城樓東望不見空回頭人間

未有歸耕處早晚重來此地遊

憶昨詩示諸外弟

憶昨此地相逢時春入窮谷多芳菲短垣困困冠翠嶺躑  
躑萬樹紅相圍幽花媚草錯雜出黃蜂白蝶參差飛此時  
少壯自負恃意氣與日爭光輝乘閑弄筆戲春色脫略不  
省旁人譏坐欲持此博軒冕肯言孔孟猶寒饑丙子從親  
走京國浮塵空竝緇人衣明年親作建昌吏四月挽船江  
上磯端居感慨忽自寤青天閃爍無停暉男兒少壯不樹  
立挾此窮老將安歸吟哦圖書謝慶弔坐室寂寞生伊威  
材疎命賤不自揣欲與稷契遐相希旻天一朝畀以禍先  
子泯沒子誰依精神不離肝肺絕背血被面無時睇母兒



王臨川全集卷十四  
三  
呱呱泣相守三載厭食鍾山薇屬聞降詔起羣彥遂自下  
國趨王畿刻章琢句獻天子鈞取薄祿歡庭闈身著青衫  
手持版奔走卒歲官淮沂淮沂無山四封瘴獨有廟塔尤  
峩巍時時憑高一悵望想見江南多翠微歸心動蕩不可  
抑霍若猛吹翻旌旂騰書漕府私自列仁者惻隱從其所  
暮春三月亂江水勁櫓健帆如轉機還家上堂拜祖母奉  
手出涕縱橫揮出門信馬向何許城郭宛然相識稀永懷  
前事不自適卻指舅館接山屏當時髫兒戲我側於今冠  
佩何頎頎況復丘樊滿秋色蜂蝶摧藏花草腓令人感嗟  
千萬緒不忍倉卒回驂駢留當開樽強自慰邀子劇飲毋  
子違

王臨川全集卷十四

律詩 五言

欣會亭

數家鄰水竹一塢共雲林晚食靜適已獨謠欣會心移牀  
隨漫興操箴取幽尋未愛神錐汝猶憐鈔斲琴

東臯

起伏晴雲徑縱橫暖水陂草長流翠碧花遠沒黃鸝楚製  
從人笑吳吟得自怡東臯興不淺遊走及芳時

歲晚

月映林塘澹風含笑語涼俯窺憐淨綠小立伫幽香攜幼  
尋新蒨扶衰坐野航延緣久未已歲晚惜流光



半山春晚卽事

春風取花去，酬我以清陰。翳翳陂路靜，交交園屋深。牀敷每小息，杖履或幽尋。惟有北山鳥，經過遺好音。

欵眠

翠幙卷東岡，欵眠月半牀。松聲悲永夜，荷氣馥初涼。清話非無寄，幽期故不忘。扁舟亦在眼，終自懶衣裳。

露坐

露坐看溝月，飄然風度荷。珠跳散作點，金湧合成波。老失芳歲易，靜知良夜多。陵秋久不寐，吾樂豈弦歌。

山行

出寫清淺景，歸穿蒼翠陰。平頭均楚製，肆耳嗣吳吟。暮嶺

已佳色，寒泉仍好音。誰同此真意，倦鳥亦幽尋。

題勇祠堂

在寶公塔院

斯文實有寄，天豈偶生才。一日鳳鳥去，千秋梁木摧。煙畱衰草恨，風造暮林哀。豈謂登臨處，飄然獨往來。

定林

漱甘涼病齒，坐曠息煩襟。因脫水邊屨，就敷巖上衾。但畱雲對宿，仍值日相尋。真樂非無寄，悲蟲亦好音。

送張甥赴青州幕

人情每期費，之子適予心。老餞城東陌，悲分歲暮襟。少畱班露草，遂往隔雲林。未覺青丘遠，因風嗣好音。

送張宣義之官越幕二首



會稽遊宦鄉海物錯句章土潤箭萌美水甘茶串香今君  
誠暫屈他日恐難忘唯有西興渡靈胥或怒張

二

誰謂貴公子乃如寒士家真宜舉敦樸已自勝浮華洲荻  
藏迷子溪篁擁若耶相望只在眼音問莫言賒

送贊善張軒民西歸

柴荆雀有羅公子數經過邂逅相知晚從容所得多百憂  
生暮齒一笑隔滄波早晚西州路遙聽下坂珂

送鄧監簿南歸

不見驪塘路茫然四十春長爲異鄉客每憶故時人水閣  
公三世雲浮我一身濠梁送歸處握手但悲辛

秋夜二首

客臥書顛倒蟲鳴坐寂寥殘燈生暗暈重露集寒條真樂  
閑尤見深禪靜更超此懷無與晤擁鼻一長謠

二

幔逗長風細窻畱半月斜浮煙暝綠草泣露冷黃花獨曳  
緣雲策仍尋渡水槎歸時參夜半鄰犬靜中譁

卽事

徑暖草如積山晴花更繁縱橫一川水高下數家村靜憩  
雞鳴午荒尋犬吠昏歸來向人說疑是武陵源

晝寢

甲子四月十  
七日午時作

井逕從蕪漫青藜亦倦扶百年唯有且萬事總無如棄置



蕉中鹿驅除屋上烏獨眠牕日午往往夢華胥

過故居

拆棧開新屋扶輿遶故園事遺心獨寄路翳目空存野果  
寒林寂蠻花午簟溫難忘舊時處欲宿愧桑門

雁

北去還為客南來豈是歸倦投空渚泊鷺帖冷雲飛垣柵  
雞長暖溝池鷺自肥憐渠不知此更墮野人機

與道原過西莊遂遊寶乘

元豐四年十月二十四日

桑楊

一作麻

已零落藻苕亦

一作復

消沈園宅在人境歲時傷

我心強穿西南

一作南

埭路共望北山岑欲覓

一作與

道人語跨

鞍聊一尋

二

親朋會合少時序感傷多勝踐聊為樂清談可當歌微風  
淡水竹淨日暖煙蘿興極猶難盡當如薄暮何

送陶氏婦兼寄純甫

雲結川原暗風連草木萎遙瞻季行役正對女傷悲夢事  
中千變生涯老百罹更慚無道力臨路涕交頤

自府中歸寄西庵行詳

意衰難自力扶路使思還強逐蕭騷水遙看慘淡山行尋  
香草遍歸漾晚雲閒西崦分明見幽人不可攀

贈上元宰梁之儀承議

梁多留詩在江寧僧舍

白下有賢宰能歌如紫芝民欺自不忍縣治本無為風月



王臨川集卷十四  
四  
誰同賞江山我亦思粉牆侵醉墨悵悵綠苔滋

贈殊勝院簡道人

早悟耆山謔今爲洛社豪有生常寂寞所得是風騷露夕  
吟逾苦雲收思共高此懷差自適千社一牛毛

懷吳顯道

南郭紅亭冷西山白道曛江光凌翠氣洲色亂黃雲歲暮  
誰邀客情親故憶君天涯獨惆悵歸鳥黑紛紛

靜照堂

任公蹲會稽海上得招提淨觀堂新構幽尋客屢攜飛簷  
出風雨灑翰落虹霓投老黃塵陌東看路恐迷

重遊草堂次韻三首

垣屋荒蕪野殿冷檀沈鶴有思隨意鷹無戀遁心禪房  
閉深竹齋鉢度遙岑寂寞黃塵裏金身倚一尋

二

僧殘尚食少佛古但泥多寒守三衣法饑傳一鉢歌寬閑  
每進竹危朽漫牽蘿悵悵庭前柏西來意若何

三

野寺真蘭若山僧老病多疎鐘挾谷響悲梵入樵歌水映  
茅簷竹雲埋薦女蘿拂塵書所見因得擬陰何

題齊安寺山亭

此山無躑躅故國有楊梅悵望心常折慙慙手自栽暮年  
逢火改晴日對花開萬里烏塘路春風自往來



自白門歸望定林有寄

蹇驢愁石路余亦倦躋攀不見道人久忽然芳歲殘朝隨  
雲暫出暮與鳥爭還杳杳青松壑知公在兩間

宿定林示無外

行移

天女穿林至姮娥度隴來欲歸今晚晚相值且徘徊誰謂  
我忘老如聞蟲造哀鄰衾亦不寐共盡白雲杯

宿北山示行詳上人

都城羈旅日獨許上人賢誰爲孤峰下還來宴坐邊是身  
猶夢幻何物可攀緣坐對青燈落松風咽夜泉

獨飯

窻明兩不借榻淨一籊籊栩栩幽人夢天天老者居安能

問香積誰可告華胥獨飯牆陰轉看雲坐久如

草堂

草堂今寂寞往事翳山椒蕙帳空留鶴蘿衣終換貂生皆  
墮天裘隱或寄公朝疊穎何勞怒東風汝自搖

示耿天籟

挾策能傷性捐書可盡年弦歌無舊習香火有新緣白土  
長岡路朱湖小洞天望公時顧我於此暢幽悃

光宅

今知光宅寺牛首正當門臺殿金碧毀丘墟桑竹繁蕭蕭  
新犢臥冉冉暮鷗翻回首千歲夢雨花何足言

示無外



支頤橫口語椎髻曲肱眠莫問誰賓主安知汝輩年鄰雞  
生午寂幽草弄秋妍卻憶東窻簟蠻藤故宛然

北山暮歸示道人

千山復萬山行路有無間花發蜂遞繞果垂猿對攀獨尋  
寒水度欲趁夕陽遠天黑月未上兒童初掩關

懷古二首

日密畏前境淵明欣故園那知飯不賜所喜菊猶存亦有  
牀座好但無車馬喧誰爲吾侍者稚子候柴門

二

長者一牀室先生三徑園非無飯滿鉢亦有酒盈樽不起  
華邊坐常開柳際門漫知談實相欲辯已忘言

與寶覺宿精舍

擾擾復翩翩秋牀燭屢昏眞爲說萬物豈止挾三言問義  
曹溪室捐書闕里門若知同二妄目擊道逾存

中書偶成

忽忽余年往茫茫不自知慙慙照清淺邂逅見衰遲輔世  
無賢業容身有聖時歸歟今可矣何以長人爲

華藏寺會故人

得泉字

百憂成阻闊一笑得畱連城郭西風裏園林落照前共知  
官似夢莫負酒如泉興罷重攜手江湖卽渺然

求全

求全傷德義欲速累功名玉要藏而待苗非掘故生未妨



王臨川全集卷十四  
徐出書何苦急墮成此道今亡矣嗟誰可與明

秋風

拏斂一何饗天機亦自勞牆隈小翻動屋角盛呼號漠漠  
驚沙密紛紛斷柳高江湖豈在眼昨夜夢波濤

次韻昌叔歲暮

城雲漏日晚樹凍裏春深慘密魚雖暖巢危鶴更陰橫風  
高曠弩殘溜細鳴琴歲換兒童喜還傷老苦心

次韻酬昌叔羈旅之作

君方困旅食子亦誤朝簪自索東方米誰多季子金高門  
萬馬散窮巷一燈深客主竟何事蕭條梁父吟

王臨川全集卷十四終



